

千字文釋義

中國書局

封面题字：张希广
封面设计

ISBN 7-80568-351-4/I·66

定价：2.20元

汪嘯尹集

千字文



中國書店

千字文释义

梁兴嗣 撰

汪啸尹 集集

中国书店出版

新华书店首都发行所发行 北京昌平长城印刷厂印刷

850×1168 1/32 印张：4.75

1991年9月第1版 1991年9月第1次印刷

印数：00001—10 100

ISBN 7-80000-251-4/I·66

定价：2.20元

千字文釋義

汪嘯尹先生纂輯

孫謙益先生叅注

江都葉敬義方氏書本文

歙西徐士業建勲氏校刊

梁勅員外散騎侍郎周興嗣

次韻

梁郡名。即今歸德府。武帝初封梁公。進爵為王。後篡齊位。因以為國號。敕者。君令臣之辭。員外者。官有常員。於常員之外。又設是官。比於正員。故云員外也。散騎侍郎。官名。隸門下省。其官始於秦時。在乘輿左右。騎而散從。無常職。漢因之。以為加官。有常侍侍郎等號。至魏時。始插貂璫。掌規諫。又置員外焉。梁初自為

散騎省。後仍隸門下。乃文學侍從之臣也。周姓興嗣名次比也。韻聲之諧者。蓋以此千字編集成文。而比之於韻。使讀者諧於口也。○按梁史。興嗣字思纂。陳郡項人。上以王羲之書千字。使興嗣次韻為文。奏之稱善。加賜金帛。太平廣記云。梁武帝教諸王書。令殷鐵石於大王書中。搨一千字不重者。每字片紙。雜碎。

無序。帝召興嗣謂曰。卿有才思。為我韻之。興嗣一夕編綴進上。鬢髮皆白。賞賜甚厚。

天地元黃宇宙洪荒

易乾卦云。天元而地黃。淮南子云。四方上下。謂之宇。往古來今。謂之宙。洪。大也。荒。草昧也。揚子云。洪荒之世。言天地開闢之初。

其時則草昧也。○此一節為下十二節之綱領。○首句第三字謹避

聖祖仁皇帝廟諱。改作元。

日月盈昃辰宿列張

天地既開闢。則有日月星辰垂象於上矣。日陽精。月陰精。盈者。月光滿也。昃者。日西斜也。月至望則盈。日過午則昃。辰者。日月

所會之次。分周天為十二宮。子丑寅卯辰巳午未申酉戌亥是也。宿者。日所躔之星也。蓋日行於天。其所當度之星。取而識之名之曰宿。凡二十有八焉。東方七宿。角亢氐房心尾箕。北方七宿。斗牛女虛危室壁。西方七宿。奎婁胃昂畢觜參。南方七宿。井鬼柳星張翼轸是也。列陳也。張布也。謂辰宿陳布於天也。淮南子云。天設日月。列星

辰調陰陽張四時。

寒來暑往秋收冬藏
閏餘成歲律呂調陽

日月運行於天而辰宿紀其次舍度數。於是日行一週天而為一日。月行二十九日有奇與日相會而為一月。積三月而成時。

積四時而成歲焉。冬之氣寒。夏之氣暑。易云。寒往則暑來。暑往則寒來。言四時相代也。萬物生於春。長於夏。收於秋。藏於冬。言秋冬而春夏在其中矣。四時既定。又以其餘日。置而為閏。蓋三十日為一月。十二月為一歲。是每歲有三百六十日也。然而天氣一週。則不止於此。自今歲立春之日。至來歲立春之日。共三百六十五日。有奇。是

每歲餘五日有奇。此謂之氣盈。又謂之大
餘。至於三十日為一月。則又不足。自今月
合朔之時。至來月合朔之時。約二十九日
有半。故有小盡之月。積至終歲。則少五日
有奇。此謂之朔虛。又謂之小餘。合二者計
之。則每歲餘十日有奇。三歲約餘一月五
歲約餘二月。八歲約餘三月。而春入於夏
矣。積至十七歲。約餘六月。而夏反為冬。冬

反為夏。寒暑變易。而歲不成矣。於是唐堯
置為閏月。以歸其餘。書堯典云。以閏月定
四時成歲是也。歲時既成。而春夏得陽氣。
秋冬得陰氣。又恐其有差錯。於是用律管
以候之。漢書律歷志云。候氣之法。為室三
重。戶閉。塗罫必周密。布緹縵室中。以木為
案。每律各一。內卑外高。從其方位。加律其
上。以葭莩灰。抑其內端。案律而候之。氣至

者灰去若此。則節令不爽。而陰陽之氣和矣。是律呂者。所以調和陰陽。言陽而不言陰者。省文以就韻也。律呂始於黃帝。命其臣伶倫。取嶰谷之竹。截以為筒。陰陽各六。六陽管為律。黃鍾。太簇。姑洗。蕤賓。夷則。無射。是也。六陰管為呂。大呂。夾鍾。仲呂。林鍾。南呂。應鍾。是也。黃鍾長九寸。應十一月。大呂長八寸三分有奇。應十二月。太簇長八

寸。應正月。夾鍾長七寸四分有奇。應二月。
姑洗長七寸一分。應三月。仲呂長六寸五
分有奇。應四月。蕤賓長六寸二分有奇。應
五月。林鍾長六寸。應六月。夷則長五寸五
分有奇。應七月。南呂長五寸三分。應八月。
無射長四寸八分有奇。應九月。應鍾長四
寸六分有奇。應十月。

雲騰致雨露結為霜

陰陽之氣既調。於是陽氣則蒸而為雲。雨。陰氣則凝而為霜露。說文云。雲。山川氣也。騰升也。致者。使之至也。釋名云。雨。水從雲下也。蓋雲升於天。所以致雨。禮記云。天降時雨。山川出雲是也。蔡邕月令云。露者。陰之液也。結凝也。易坤卦云。履霜。堅冰。陰始凝也。蓋霜露本一物。其潤澤則為露。其凝結則為霜。詩秦風云。白露為霜是也。此言